



Planuar / Doretuar Priljezha / Prodato Received / Delivery	28 . 10 2022	2 viti god year	
Organ / Njësia Organ / Jedinica Org / Unit	Nr Prot Br Prot Prot No	Shtojca Prilog Appendix	Sasia Kolicina Quantity
SKRIMSHCK	6522/2022		114



Republika e Kosovës Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.836/2022

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave i përbërë nga: Ardita Haxhnikaj-Demi, kryetare, Eshref Shabani dhe Malsore Gashi-Bajraktari, anëtarë, me Avdyl Bekteshi-Zyrtar i Lartë për Bashkëpunim Profesional në cilësinë e procesmbajtësit, ka shqyrtuar ankesën A.nr.836/2022 të datës 30.09.2022, të parashtruar nga ankuesi _____ nga _____ kundër organit të punësimit/Komuna e Mitrovicës së Jugut, në çështjen juridike “shkelje e të drejtës në pagë”, duke vepruar në pajtim me nenin 6 paragrafin 1 nënparagrafin 1.1, nenin 16 paragrafi 3 dhe nenin 18 paragrafin 1 nënparagrafin 1.3 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Rregullat dhe Procedurat e Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 28.10.2022, mori këtë:

V E N D I M

I. Aprovohet pjesërisht si e bazuar ankesa me numër A.nr.836/2022 e datës 30.09.2022 e parashtruar nga ankuesi

II. Obligohet Kryetari i Komunës së Mitrovicës së Jugut, që brenda afatit prej pesëmbëdhjetë (15) ditësh nga data e pranimit të këtij vendimi të inicioj veprimet e nevojshme ligjore për harmonizimin e koeficientit të nëpunësit civil Haxhimet Ferati nga koeficienti shtatë pikë pesë (7.5) në koeficientin tetë pikë pesë (8.5).

III. Këshilli i Pavarur Mbikëqyrës për Shërbimin civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Ankuesi _____ i punësuar në Komunën e Mitrovicës së Jugut, më datë 30.09.2022 ka parashtruar ankesë me numër protokollit 5776/2022, në Këshillin e Pavarur Mbikëqyrës për Shërbimin Civil të Kosovës, me pretendimin që ti njihet e drejta e harmonizimit të koeficientit të

pagës nga shtatë pikë pesë (7.5) në nëntë pikë pesë (9.5), në pozitën e Zyrtarit përgjegjës të Prokurimit në Komunën e Mitrovicës.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, me datë 06.10.2022 ka proceduar kërkesën për përgjigje në ankesë në Komunën e Mitrovicës së Jugut. Ndërsa, Këshilli me datë 11.10.2022 ka pranuar përgjigjen në ankesë së bashku me shkresat e bashkëngjitura të lëndës.

Kolegji për Shqyrtimin dhe Vendosjen e Ankesave, me qëllim të vërtetimit të plotë dhe të drejtë të gjendjes faktike dhe bazës juridike, për marrjen e vendimit meritore ka administruar këto prova: Ankesën me numër të protokollit 5776/2022 të datës 30.09.2022 të parashtruar nga ankuesi në Këshillin e Pavarur Mbikëqyrës për Shërbim Civil të Kosovës; Akt Emërimit e datës 09.12.2013 në emër të ankuesit; Kërkesën me numër reference: 01-120/04-0084998/22 të datës 14.09.2022 të ushtruar nga Kryetari i Sindikatës të Punësuarve në Komunën e Mitrovicës; Përgjigjen në kërkesë me numër reference: 01-120/04-0084998-2/22 të datës 26.09.2022 të Menaxherit të Burimeve Njerëzore; Zarin e datës 28.09.2022; Kërkesën për përgjigje në ankesë me numër protokollit 5914/2022 të datës 06.10.2022; Përgjigjen në ankesë me numër të protokollit 5071/2022 të datës 10.10.2022 (dorëzuar me email); Listën e pagave për muajin shtator dhe gusht 2022 për ankuesin; Përshkrimin e detyrave të punës për pozitën Shef i Zyrës së Prokurimit; Fletë dorëzimit e datës 27.09.2022, Shkresa DASHC/MAP-04/1571 02/ZPS/3851 të datës 20.11.2014, Kërkesën e datës 19.09.2022 për Departamentin për Menaxhimin e Zyrtarëve Publikë-MPB; Përgjigjen e datës 30.09.2022 nga Departamenti për Menaxhimin e Zyrtarëve Publikë-MPB dhe kërkesën e datës 03.10.2022 për Departamentin për Menaxhimin e Zyrtarëve Publikë-MPB.

Kolegji për Shqyrtimin dhe Vendosjen e Ankesave pasi ka shqyrtuar shkresat e lëndës të parashtruara nga palët në procedurë, konstatoi se ankesa e ankuesit, është pjesërisht e bazuar, **SEPSE:**

Kolegji i Këshillit nga administrimi i provave të lëndës ka gjetur se ankuesi sipas Akt-it të Emërimit të datës 09.12.2013 është i punësuar në pozitën e punës *Shef i Zyrës së Prokurimit/Spektori i Procedurave*, në Komunën e Mitrovicës me koeficient 7.5 të pagës. Tutje Kryetari i Sindikatës të Punësuarve në Komunën e Mitrovicës më datë 14.09.2022 i është drejtuar më kërkesë Kryetarit të Komunës që të bëjë rregullimin e koeficienteve të pagës për të gjithë udhëheqësit e sektorëve në Komunën e Mitrovicës nga shtatë pikë pesë (7.5) në tetë pikë pesë (8.5), ndërsa Menaxheri i Burimeve Njerëz përmes shkresës nr.reference 01-120/04-0084998-2/22 të datës 26.09.2022 ka refuzuar kërkesën e datës 14.09.2022.

I pakënaqur me përgjigjen e organit të punësimit, ankuesi me datë 30.09.2022 ka parashtruar ankesë në Këshillin e Pavarur Mbikëqyrës për Shërbimin Civil të Kosovës, me pretendimin ankimor për njohjen e të drejtës për harmonizimin e koeficientit të pagës nga shtatë pikë pesë (7.5) në nëntë pikë pesë (9.5), sikurse për pozitën e njëjta të Shefave të Zyrës së Prokurimit në institucionet tjera.

Kolegji i Këshilli duke u bazuar në dispozitat e nenit 11 paragrafi 1 nën paragrafi 1.3 të Ligjit Nr.06/L-114 për Zyrtarët Publikë, më datë 19.09.2022 dhe 03.10.2022 i është drejtuar me shkresë

Departamentit për Menaxhimin e Zyrtarëve Publikë pranë Ministrisë së Punëve të Brendshme, si organ përgjegjës për përgatitjen dhe mbikëqyrjen e zbatimit të politikave për pagat e zyrtarëve publikë dhe funksionarëve publikë, duke kërkuar informacione në lidhje me koeficientin e pagës për titullin e punës *Shef i Zyrës së Informimit*. Kjo e fundit duke u përgjigjur në kërkesë, më datë 04.10.2022 ka njoftuar se në bazë të Shtojcës Nr.1/7 të Rregullores (QRK) Nr.26/2020 për Klasifikimin e Vendeve të Punës në Shërbimin Civil, kjo pozitë është e barasvlershme me Udhëheqësin e Divizionit (Sektorin) në Agjenci Ekzekutive dhe se edhe katalogu i vendeve të punës ka përcaktuar pozitën Udhëheqës i Sektorit... Drejtues i Ulët 2, koeficienti i pagës është 8.5.

Kolegji i Këshillit po ashtu lidhur me pretendimet ankimore të ankuesit ka analizuar edhe provat tjera materiale të lëndës, respektivisht shkresën me numër DASHC/MAP-04/1571 02/ZPS/3851 të datës 20.11.2014 të lëshuar nga Departamenti për Administrimin e Shërbimit Civil/MAP, përmes të cilës shkresë DASHC kishte kërkuar nga udhëheqësit e organizatave buxhetore që të harmonizohet koeficienti i pagës për disa pozita të punës, ku ndër të tjera është kërkuar që koeficienti i pagës për pozitën e punës *Udhëheqës i Sektorit* të vendoset koeficienti i pagës tetë pikë pesë (8.5).

Andaj, duke marr parasysh konstatimin se ankuesi mban pozitën e punës *Shef i Zyrës për Prokurim/Sektorin i Procedurave*, pozitë kjo ekuivalente me pozitën e *Udhëheqësit të Sektorit*, për të cilat pozita organi përgjegjës për administrimin e Shërbimit Civil (DASHC) kishte vendosur koeficientin e pagës tetë pikë pesë (8.5), dhe në kuptim të dispozitat e Ligjit Nr.06/L-114 për Zyrtarët Publikë, përkatësisht nenin 19 ku përcaktohet se: *Zyrtari publik ka të drejtë në pagë dhe shpërblim për punën e kryer si dhe shtesa të përcaktuara me Ligjin e Pagave*, dispozitat e Ligjit Nr.03/L-147 për Pagat e Nëpunësve Civil, përkatësisht nenin 3 paragrafi 1 dhe 2 ku përcaktohet se: 1. *E drejta e nëpunësve civil për pagë të drejtë dhe të rregullt është e garantuar në bazë të kushteve të përcaktuara më këtë ligj dhe me Ligjin e Shërbimit Civil*. 2. *Institucionet e administratës publike të Republikës së Kosovës janë të detyruara të paguajnë pagë të njëjtë për punën me vlerë të njëjtë....*, Kolegji i Këshillit konstaton se ankuesit i njihet e drejta e harmonizimit të koeficientit të pagës me titullin e punës, gjegjësisht harmonizimin e koeficientit të pagës nga shtatë pikë pesë (7.5) në tetë pikë pesë (8.5), rrjedhimisht duke u bazuar në dispozitat ligjore të sipër cekura dhe më qellim të respektimit të dispozitave të Ligjit Nr.05/L-021 për Mbrojtje nga Diskriminimi, Kolegji i Këshillit konstaton se në këtë çështje administrative janë përmbushur kushtet ligjore për aprovimin e pjesshëm të ankesës duke i dhënë të drejte ankuesit për rregullimin e koeficientit të pagës nga shtatë pikë pesë (7.5), në tetë pikë pesë (8.5), për pozitën e punës *Shef i Zyrës së Prokurimit*.

Ndërsa nga provat e administruara të lëndës është konstatuar se pretendimi ankimor i ankuesit për vendosjen e koeficientit të pagës nëntë pikë pesë (9.5) nuk ka mbështetje në aktet ligjore dhe nënligjore me të cilat rregullohet çështja e pagave të zyrtarëve publikë, ashtu sikurse nuk ka mbështetje as në politikat e nënshkruara nga Departamenti për Menaxhimin e Zyrtarëve Publikë, si organ përgjegjës për administrimin e Shërbimit Civil në Republikën e Kosovës, dhe në këtë kuptim vendosi për refuzimin e këtij pretendimi ankimor si të pa bazuar.

Andaj, për sa me sipër dhe duke u bazuar në dispozitat e nenit 18 paragrafin 1 nën paragrafi 1.3 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, dhe nenin



132 paragrafi 4 të Ligjit Nr.05/L-031 për Procedurën e Përgjithshme Administrative, Kolegji i Këshillit vendosi si në dispozitiv të këtij vendimi.

Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.836/2022

Avdyl BEKTESHI

Zyrtar i Lartë për Bashkëpunim Profesional

Ardita Haxhnikaj-DEMI

Kryetare e Kolegjit

Vendimi i dorëzohet:

- Ankuesit
- Kryetarit të Komunës së Mitrovicës së Jugut;
- Udhëheqësit të Burimeve Njerëzore në Komunën e Jugut; dhe
- Arkivit të KPMSHCK-së.